

Alle Jahre wieder: Wéi Dir jo all wësst fueren mir bei de Scouten nëtt nom Kalennerjoer, mais nom Scoutsjoer, dat sëch um Schouljoer orientéiert. Mein Aperçu z'Joert op der Generalversammlung hat mat der Summervakanz 2015 opgehal. Duerfir wëll ech Iech elo hei, an der nämlecher Logik, en Iwerbléck ginn, iwert d'Aktivitéiten vun eisem Grupp am Scoutsjoer 2015/2016.

D'Scouts-Joer 2015/2016 bei de Scouten St. Martin Duelem

- Daat neit Scoutsjoer gong fir eng Delegatioun vun den Duelemer Cheffen lass mam **LGS-Kongress** Mëttwochs den 23. September 2015 zu Betebuerg am Schlass. Dëse Kongress ass d'Generalversammlung vun eisem Verband, mat Réckbléck an Ausbléck souwuel um operationellen, wéi och um finanzielle Plang. Esou eng Manifestatioun ass nett ganz sexy, mais awer néideg fir d'Kohärenz vum Verband no bannen, an d'Transparenz no baussen. Ënnert dem Virsätz vum Roy Grotz konnt den Timing ziemlech genau agehal gin, a mir koumen beizeiten op de Patt.
- Och dëst Joer hate mir eis schlecht opgestallt, fir unzekommen. Eise Schnupperdag war lang virdrun op den 3ten Oktober fixéiert, mais gudd 10 Deeg virdrun hate mir nach kee Plang, wien d'Flyer'en kopéieren a verdeele géif. Gottseidank hu mir vill flexibel Frënn, déi och kurzfristeg bereet sinn ze hëllefen wann Nout um Grupp ass, an esou hate mir bis 3 Deeg virum Schnupperdag awer nach all eis Invitatiounen ënnert d'Leit bruecht.
- Nach eemol huet de Verband an dësen Deeg d'Cheffen vun den LGS zesummegeruff. An zwar fir Sondes de 27te September 2015 war , och zu Betebuerg, de **Chefdag 2015** organiséiert ginn. Heihin huet eise Gruppchef de Steve, eng Delegatioun vun eisem Grupp zesummegeféiert, fir sech do, mat de Consignen an Iddien vum Verband fir déi nei Saison an doriwer eraus bekannt ze machen. Leider war d'allgemeng Impressioun déi, dass d'Brancheverksammlungen nomëttles eigentlech e rengen Zeitverloscht waren, well kaum irgendwou irgendeppes Substantielles gesoot gouf an sech d'Equppen gréistendeels duerchgewurschtelt hun fir séier un den Ofschlosspatt ze kommen.
- Samsdegs den 3ten Oktober 2015 war dun eise **Schnupperdag 2015**. Mir haten op déi bewährte Formule vun enger gleichzeitiger Musterversammlung vu Biber a Wëllef zeréckgegraff, wou déi nei Kandidaten direkt am Krees vum hirer jeweeleger Branche matgehollet gin, a wou mir d'Elteren mat enger Kaffisstuff probéieren iwert eis Bewegung an daat waat hirt Kand bei eis erwaart opzeklären. An engems probéiere mir iwerdeems natiirlech och Elteren unzespriechen sech bei eis an Amicale oder Chefféquipe ze engagéieren. Erfreelecherweis war daat dëst Joer erfollegreich an esou konnte mir, nieft enger Reih neier Kanner fir Biber a Wëllef, och eng nei Frëndin fir d'Reihen vun eiser Amicale notéieren. Der sollten der esouguer am Laaf vun dëser Saison erfreelecherweis nach 4 gudd Leit beikommen, fir eis Amicale ze verstärken an ze verjéngen.

- Fir Samsdegs den 10. Oktober 2015 hat eis Gemeng d'Vezeiner fir eng weider Editioun vun der **Groussbotz** opgeruff. Mat enger Delegatioun vun iwer 30 Kanner, Jonker a Cheffen stounge mir pénktlech bei der Gemeng, wouhin mir irtümlecherweis bestallt gi waren. Nodeems mir d'Tuten an d'Bongen dohin bruecht kruten, hu mir eis gedeelt. Enn Deel ass de Wee gangen, deen eis zougeduecht war, während en 2. Grupp am Duerf bliwwen ass, a ronderem den Home eis Wiss, an de Kierfecht dem Knascht zu Leif geréckelt ass, do wou soss keen aneren hi komm ass.
- Den nächsten Dag ware mir direkt nees am grénge Hiem a mat eisem Fändel am Asatz. Et war **Kommémoratiounsdag**, an do hu mir eis mat enger staarker Delegatioun an alle Gréissten, u Kortège, Te Deum an Gedenkzeremonie bedeelegt.
- A well mir du schon uniforméiert an op de Been waren, hu mir direkt weidergemacht. No der Kommémoratioun si mir mat der Cheféquippe an den Home gang, fir no engem kurze Pic-nic den 1. **Grupperot** an der neier Saison ofzehalen. Esou hu mir vill méih Zeit an domat Rouh wéi owends, a mir kënnen déi nei Saison grëndlech viirbereeden. Am Nomëtteg koumen dunn nach eis Frënn vun der Amicale dobei, an zesummen hu mir fir d'éischt op déi rezent Geburt vum Oskar Pinto ugestouss an dun hu mir owends e Fierkel gefruppst, daat am Nomëtteg beim Home um Grill gelandt war. Esou hat déi nei Saison gudd ugefang.
- Et war nees Hierscht, an domat **MontéesZeit** bei de Scouten. De 17.10.2015 hun daat e ganz groussen Trapp Kanner vun de Biber bei d'Wëllef gemacht. Vum 6-8ten November hate sech **d'RaRo** zu Beggen am Chalet ageriicht fir do an engem zünffttege **MontéesWE** hir nei Memberen ze initiéieren. De selwechte WE waren eis **Avex**, mat hiren neie Frënn um **Montées** WE zu Miersch am Chalet vun de Loutres vun der FNEL. Hei hun 4 Nachwuchsschlumpfen müssen mat enger Partie Spiller an Epreuven beweisen, dass sie scho schlumpfeg genuch waren fir mat den alen Avexschlumpfen kënnen matzeschlumpfen. An d'Carapioen goufen um WE vum 19-20.12.2015 mat neie Leit aus den Avex bereichert. Elo waren d'Karten fir déi nei Saison nei verdeelt, an all Mënsch war do placéiert wou hien fir dëst Joer géif higehéieren.
- Dënschdes den 10.11.2015 hate mir eis kleng Scouten vu Biber a Wellef an den Home geruff, fir do mat hinnen eng **Mäertensfeier** ze erliewen. E puer kleng Filmer hun eis d'Liewen an d'Bedeutung vun deem Hellege Mann, deen mir zum Patréiner vun eisem Grupp erwielt hun, virun A'en geféiert. Duerno hu mir Lantere gebastelt a sinn domat dun zesummen an der Daischttert e kleng Kortège iwert d'Wiss maache gang. Zum Enn hu mir eis bei engem Martinsfeier versammelt, an zesummen Schoky a Kuchemännercher gedeelt.
- Den Advent stoung virun der Diir, an domat eng schéin Zeit awer och vill Arbecht. Emseg si Päck mat Kärzen an Dekosmaterial an den Home geschleeft gin, Dënschdes de 24 ten November 2015 koum nach en Unhänger voll Dännekränz an de Garage dobei, an ab Donnegdes dem 26ten waren fleisseg Hänn owends amgang éischt **Adventskränz** fäerdeg ze maachen. Samsdegs den 8ten November ass et dunn eescht gin. Eis Wëllef an Avex, verstärkt an encadréiert duerch hir Cheffen an eiser bewährter Adventskranzkonfektionséquippe aus Elteren vun eise Kanner a Frënn vum Grupp, hu bis Mëtteg all eis Kränzrohlinge verschafft an zu schéinen Advents an Diirkränz verwandelt. 99 Stéck waren direkt bestallt oder moies verkaaft gin, a 4 Stéck hu mir nach konnten an de Buttek Mosaik bréngen.

- Sondes den 29ten November 2015, um 1. Advent, haten sech nees eng Handvoll vun eise Cheffen RV ginn, fir mat hirem Gromperekichelchersstand bei der **Porte ouverte am Buttek Mosaik zu Felschdreff**, hire Steng beizedroen an deem gemeinsamen Mosaik dat vu Barmherzegkeet a Mënscheléift schwätzt, an eis op d'Kommen vun eisem Erléiser Jesus Christus hiweist, an eis an déi richteg Stëmmung versetzt. Eng besser, daat heescht eng méih authentesch Astëmmung op d'Krëscht dagszeit kann ech mir bal nett viirstellen.
- Direkt den Owend duerno hate mir schon den nächste Groussasatz. An der Coque stoung Méindes den 30ten November 2015 nees **d'Night of the proms** um Programm, a mir stoungen mat 50 Leit bereet, fir bei dëser Groussveranstaltung de Catering ze stämmen.
- An d'Biberversammlung vum 5ten Dezember koum dëst Joer endlech emol nees héigen himmleche Besuch. **De Klés'chen a sei schwarze Gesell** sinn erem eng Kéier bei d'Duelemer Scouten komm. De Gesang zu Eieren vun deem hellege Mann war zwar ziemlech wönsch, daat huet de Klés'chen awer nett ofgeschreckt. Nodeems hien aus sengem Décke Buch, verschiddene Kanner d'Levite gelies hat, huet sech nees seng Kannerfrëndlechkeet duerchgesaat, an hien huet all Kand an all Cheff mat enger gudd gefëllter Tiitchen mat Schneekegkeeten verwinnt.
- Fir d'Feierlechkeeten ronderem **d'Friddenslicht vu Betlehem**, hate mir dest Joer eis méih weit wollten anbréngen. 2015 waren et 20 Joer hir dass Duelem eng 1. Kéier eng Delegatioun op Wien geschéckt hat, fir d'Flaam déi, wéi eisen Erléiser zu Betlehem gebuer gouf, fir Lëtzebuerg sichen ze fueren. Duerfir hate mir bei der Verdeelung zu Perl 2014 eis Kandidatur gestallt, fir dess Charge 2015 nees fir Lëtzebuerg ze iwerhuelen, an dann och nees d'Verdeelungsfeier, sou wéi 1995, zu Duelem selwer ze organiséieren. Mir kruten wuel den Accord, fir d'Friddenslicht op Wien sichen ze fueren, awer d'Verdeelungsfeier sollt 2015, nom nämlechte Schema wéi 2014, zu Perl mat enger grenziwerschreidender Festlechkeet organiséiert gin. Domat ware mir der Arbecht entbonnen. Esou koum et, dass Freides den 11ten Dezember 2015 ab 18:00, sech 6 Memberen vun eisem Grupp zesumme fonnt hun, fir déi 915 km op **Wien** ze maachen. Ronn 33 Stonnen Openthalt waren hinnen zu Wien ginn. Genuch fir e wéineg Sightseeing, e Kaffi an e Stéck Sachertorte an der Patisserie vum Hotel Sacher ze genéissen, en original Wiener Schnitzel ze fruppsen, d'Qualitéit vum éisteresche Wein kennezeléieren, an, an enger bewegender Feier an der Kirch am Wiener Stadtdeel Simmering, Samsdegs mëttles den 12.12.2015, zesummen mat ganz ville Scouten aus méih wéi 22 Länner, dorënner och d'Boyscouts of America, d'Friddenslicht vu Betlehem aus den Hänn vum ORF-Friedenslichtkind 2015 ze empfänken. Dëse Spektakel, mat esouvill verschiddenen Uniformsfarwen an Traditiounen huet engem nees déi grouss international Dimensioun vum Scoutismus virun A'en gefouert. Stoltz, zu dëser grousser Famill ze gehéieren, hun eis Lichtbringer d'Flaam vu Betlehem Sondes owends sëcher zu Lëtzebuerg ugeliwwert. 3 mol haten sie musse stall halen, well eng vun den 3 Kärzen ausgang war, mais schlieslech koume sie mat 3 Flämmercher vum original Liicht doheem un. Elo sollt dëst Liicht och an eiser Regioun sein Wee maachen.
- Duerfir waren Samsdes den 19ten Dezember all Guiden a Scouts-Gruppen aus Lëtzebuerg an aus der Grenzregioun op **Perl an de Schengelycée** invitéiert gin, fir do, no allerlee interaktiven Aktiounen zum Thema Flucht a Flüchtlingen, d'Friddenslicht

vu Betlehem an enger grousser Schlussveillé ze kréien. Grouss war de Chaos, deem d'Organisateuren vun der Feier fäerdeg bruecht haten, well keen richteg a verbindlech gesoot kruut, waat hien wéini a wéi lang sollt machen. A well mir Duelemer, als Frideenslichtkuriere, ganz vague gesoot kritt haten, mir sollten zu Ufank vun der Schluss-Veillé d'Friddenslicht viirstellen, hu mir daat och gemacht. Mat enger Präsentatioun vun 25 Minuten hu mir de Wee vun der Flaam bis op Perl nogezeechent, an och ganz daitlech ze maache probéiert, firwaat déi Flaam vu Betlehem kënn an nett vu Bréissel oder vun New York. Daat huet nett jidferengem an der Organisatiounséquipe gefall. Mais amplatz sech fir de Schlussakt un hir eegen Ukënnungen ze halen, ass fir d'Verdeelen vun der Flaam, irtëmlecherweis de Sandweiler Grupp op d'Bühn geruff gin. An déi., nett faul, a vu kengem op der Bühn, besonnesch nett vun hire Cheffen, gebremst, hun och direkt ausgeféiert, waat eigentlech Aufgab vun eise Jonken sollt gewiecht sinn. Entsprechend laang waren eis Gesiichter no der finaler Pleite. Och wann sech de Responsabelen no Feststellung vu sengem Lapsus no Kräften entschëllegt huet, war eisen 3 jonke Frënn d'Oofschléissen vun hirer Missioun verduewe gin.

- De selwechte WE war nach allerhand lass an eisem Grupp. Vum 18-20.12. waren eis **Carapio mat hirem Montéescamp ënnert** dem Thema „Big brother“ zu Schëtter am Chalet agefall, a vum 20-21.12. 2015 hu sech och eis **Biber um Kuelbecherhaff** fir en 1.te **WE** mat hiren neie Kanner an hirer erneierter Chefféquipe aquartéiert. Mat deem Camp vun de Carapio war fir dëss Saison d'Montéskarussel nees fäerdeg mat dréien. Flott a bemierkenswärt war, dass bei den 2 Branchen **nei Cheftainen** hiren 1. Asatz haten déi am Hierscht bei eis komm waren. Et waren daat d'Natalie Bricher, waat sech fir d'Carapio entscheed hat an d'Sue Dicken souwéi d'Maité Simon, déi eis Bibercheféquipe verstärke komm sinn.
- Vum 20. - 21.12.2015 waren eis **Biber** wéi gesoot um Kuelbecherhaff fir e **WE**, ennert dem Thema "**Kreschtdag**". Hei hun sie schéin Kreschtdéko gebastelt, e flott Gänsepill an e ganze Koup Spiller dobaussen an der Natur erlieft. A sie waren dun nach pénktlech zeréck zu Duelem fir eis gemeinsam Krëschtfeier mam Grupp.
- Mir konnten nett laang op deem Réckschlaag vu Perl sëtze bleiwen, well 2 Deeg méih spéit huet schon déi nächst Groussaktioun op eis gewaart. No enger Paus 2014, hate mir fir den 21.12.2015 nees eng **Krëschtfeier** fir de ganze Grupp op d'Been gestallt. Em 16:30 hu sech eis Memberen (vu Wëllef bis Amicale) bei der Schoul zu Duelem getraff fir vun do mat e puer Lanteren d'Friddenslicht an d'Duelemer Kiirch ze begleeden. Trotz ziemlech Wand sinn e puer Flaamen och do ukomm, wou mir zesummen eng besënnlech Krëscht dagsveillé bei der Krëppchen erlieft hun a wou mir dem Jesus eis Häerzer mam Gesank vun bekannte Krëscht dagsladder opgemacht hun. Mat de Biber, déi antëschend vun hirem Camp bei eis komm waren, si mir an den Home gang, wou d'Annouck eis e schéine Krëschtbaam gerëscht hat. Do hu mir eis géigenseiteg e klenge Cadeau geschenkt, éih mir un den Dësch gange sinn fir eng lecker Lasagna ze fruppsen déi de Steve an d'Monique eis iwert de WE gezaubert haten. Obwuel mir zu méih wéi 70 Leit um Dësch waren, ass nach Lasagna iwreg bliwwen. Beim Steve ass nach keen hongrech vum Dësch gang.
- 3 Deeg drop, op **helleg Owend** hate mir eis fir d'läsch an desem Joer RV gin an de gréngen Hiermer. Mat dem Friddenslicht vu Betlehem hu mir eis, wéi schon zanter

21 Joer, op de Wee gemacht fir eeler a krank, oder soss sensibel Mënschen mat eisem Besuch, enger Kärz mam Friddenslicht an e puer Kichelcher eng kleng Freed ze maachen. Dës Joer, war eisen Tour nees en zoudéifst bewegend Erleefness. Grouss Erstaunen, richteg Freed, jo esouguer Tréinen vu Freed hun eis gewiesen, dass d'Mënschen sech no Léift, Fridden a Mënschlechkeet sehnen, an dankbar sinn fir en Zeechen vun Hoffnung. Mat 3 Equippen hu mir den Tour iwert d'Dierfer gemacht, a mir konnten mol nett all eis Adressen bedéngen. Schued dass mir nett méih Kanner a Jugendlech bewegt kréien, dës wonnerbar Traditioun weiderzedroen. Um 17:30 war d'Familljemetten zu Duelem ugesaat, an do wollte mir och nach dobei sinn mat engem Stand Glühwein Schoky a Kichelcher an engem dekoréierte Glas an deem mir de Leit eng kleng Kärz mam Friddenslicht mat op de Wee an hir Familien gin hun. Um Enn vun engem intensiven Nomëtteg hu mir eis Äddi gesoot an eis schéi Krëschtdeeg gewënscht, mat engem gudde Gefill am Häerz, d'Welt fir eng Reih Mënschen, haut e bësche méih hell gemacht ze hun. Elo konnten och mir zefridden Krëschttag feieren goen.

- **Exit-game**, daat ass naischt fir Leit, déi ënnert Claustrophobie leiden. An engem Raum agespaart muss eng Equippe, bannend enger begrenzter Zeit, mat de moyens du bord, Rätselen ëm e Kriminalfall léisen, an déi am Raum verstoppte Schlësselen an Hinweiser fannen, fir zur Zeit kënnen hire Prisong opzespäeren an ze verloossen. Dës modernen Nervekitzel haten sech eis **RaRo** fir Freides den 22te Januar 2016 veruedent. Trotz Panikmache an de Medien iwert ze erwaardent glaat Stroossen, hun sie sech op Saarbrécke gemaacht, fir sech der Aufgabe ze stellen. An den Erfolleg, souwuel beim Spill, wéi och beim Wee huet hinnen Recht gin.
- Fir Dëschdes de 26te Januar 2016, hate mir eis **Generalversammlung 2016** ugemell, fir domat no bannen wéi no baussen Rechenschaft ofzelé'en souwuel iwert eis Finanzen, wéi och iwert daat waat bei den Duelemer Guiden a Scouten an der vergangener Saison gelaaf war, a waat fir déi nei Saison geplangt war.
- Donnedsdes den 28. Januar 2016, hun eis **Carapio** hir Versammlung genotzt fir mat de RaRo eng Partie **Lasertag** spillen ze goen, an esou mat Schwong emol eppes Neies ze probéieren.
- Donnedsdes den 11te Februar 2016 haten **d'Albatrossen** mol nees en extra RV. Zu enger grousser Equippe si sie an der Duelemerstuff agefall fir eng **Partie Keelen** an e gudde Maufel.
- Fir Freides den 19 Februar haten d'Carapioen, RaRo Albatrossen a Cheffen op hier **LAN-Party** an den Home invitéiert, wou sie bis fréih moies hir Kompetenzen a verschiddene Computerspiller konnte géinteneen moossen.
- Fir Samsdegs de 27. Februar 2016 war emol nees Gemittlechkeet um Programm. Fir eis alljährléich **Agape** bei de Scouten hate mir dës Joer, eis Cheffen, eis Amicale an all Leit déi eis op der Kirmes gehollef haten, op e gudde Maufel an der Restaurant Kohn op Altwies invitéiert. De Steve huet am Rapport vum Grupperot vum 29te März heizou als Bilan festgehalen: "mir haate gutt giess".
- Fir Dëschdes den 1. März 2016 hate mir schon nees all eis Memberen owends an den Home invitéiert, fir do mat engem gudden Iessen den **23. Gebuertsdag** vun eisem Guiden a Scoutsgrupp ze feieren. All Branche steiert Dessert oder Zaloten bei, an de Steve organiséiert eng lecker Grillade. A well daat esou fréih am Joer meescht déi

éischt nom Wanter nees ass, huet een daat erem richteg gär. Eng gudd 50 Leit hun esou e flotten, a genossreichen Owend erlieft. Duerno konnte mir nach zesummen, 5 vun eise Frënn nolauschteren, déi eis hir Erliedfesser a Japan um **Weltscoutsjamboree** am Summer 2015 a Bild an Toun présentéiert hun.

- Am Verlaaf vun de folgende Wochen haten sech d'AvEx an hierer Versammlung der verschéinerung vun eisem Home verschriwwen. Mat Herzblut a vill gudden Iddien hu sie hire **Projet Pimp-my-Lounge** realiséiert. Vum Resultat kënnt Dir Iech all selwer e Bild machen. Ënnert de Palmen hei riets lëmmelt et sech extra gudd.
- Vu Gréngen Donnegdeg dem 24ten März owends bis op Karfreideg owends waren nees eng Handvoll Scouten mam Carlo ënnerwee fir **d'Operatioun Getsemani 2016**. Mat dëser betount spiritueller Démarche, probéieren mir, als Krëschten mam Jesus um Wee ze sinn a senge schwéierste Stonnen, an eis esou méih intensif a richteg op Ouschteren dem Fest vun eiser Erléisung viirzebereeden. Op Karfreideg nomëtteg, hu mir dobei nach e Kannerkraizwee vu Fëlschdreff op Duelem organiséiert an ofgehalen, un dem sech erfreetecheerweis, nieft frieme Kanner, och vill vun eise kleng Scouten bedeelegt hun.
- Samsdegs den 16ten Abrëll 2016 hu mir eis owends mat engem grouse Grupp vun Avex, Carapios, Albatrosse a Cheffen am Home getraff. De **Pélé des jeunes 2016** stoung vrun der Diir. Mat enger gudder Raclette hu mir Kierper op eise Pilgergang viirbereed, a mat enger reliéiser Veillée de Geesch. Zu 26 Pilger si mir schlieslech nuets géint 1:30 op de Wee bei d'Tréischterin gang fir do em 7:30 un der Pélésmass an der Kathedral deelzehuelen. Wéi all Joer si mir duerno zesummen op de Märtchen Kaffi drénke gang, éih jidfereen heemgeschlach ass, fir e wéineg Schlof nozehuelen.
- De Mëttwoch duerno, den 20ten Abrëll hat d'Fondatioun vum **mérite jeunesse** hir jonk Lauréaten fir d'Remise d'Insigne an d'Stadt an de Forum um Geeseknäppchen geruff. 2 vun eise jonke Frënn, de Carlo Glod an d'Shirin Vandivinit waren fir de Niveau Sëlver dobei a kruten hiren Insigne aus den Hänn vum Pränz Guillaume. Duelem war alt nees dobei. (als déi eenzeg Lauréaten vun den LGS).
- Fir Sondes de 24ten Abrëll haat d'Carapioséquipe nees op de **JOCAP** (d'Journée Carapio) Invitéiert. Dëss Kéier op Eschdurf. 21 Truppen dorënner och déi Duelemer, waren do präsent fir de ganzen Dag iwwer op 8 Spillstatiounen dobaussen ënnerwee ze sinn. Vun Kajotklammen iwwert Kéisfëschchen bis bei eng béis Mausfal war alles ënnert den Thema "**Deck den Kéis**" placéiert. Fir dass een och esou richteg den Kéis konnt kréien haten se zu Eschdurf esuguer fir Schnéi gesuergt. Gewonnen hu schlussendlech, mat engem groussen Virsrpong, d'Bartrenger CaraPio.
- Eng aaner flott Aktiviteet vun eise **Biber a Wëllefcher** war d'**Oktav-Andacht** Samsdegs den 30.04.2016 an der Staat wou eng 300 Kanner dobei waren. D'Organisateuren haten sech nees flott Spiller als Virbereedung afalle gelooss. Leider haat et deen Dag awer riet eran gereent, sou datt et heivun keng Fotoen gin. De Spass an d'Freed hu sech déi kleng Pilger awer nett verdiewe gelooss. Mir si jo keng Schéinwieder-Scouten!
- Mat aldeem war et scho Mee gin, an eng vun eise gréissten alljährechen Erausforderungen stung virun der Diir, eis Kiirmes. An de Versammlungen ass eifreg gebaut a gebastelt gin, an ëmmer méih Material huet sech am Home gesammelt, bis et Dëschdes dem 3te Mee schlieslech zur Entluedung koum. Bannend 2 Stonnen haten

vill fleisseg Hänn d'Scoutswiss voller grousser Zelter gestalt, an d'Gedrénksstänn an d'LGS-Bühn goufen plazéiert. Op deser Bühn gouf, soubal et daischter war, déi 5. *international* (den Zerluff war dobei) *Albatrosssummerraclette* zelebréiert. Et huet een jo misste gestärkt sinn fir de Strapazen vun den nächsten 3 Deeg gewues ze sinn. No engem weideren Dag Oprichten a Viirbereeden, war Mettwochs owends alles bereet fir den **5. NewcomerFestival zu Duelem**. Op der Affiche stoungen d'Formationen: Redhills; District 7; Quantum Dot; sweet Pandora; Fallen Lies an Justice of the trigger. Daat huet bis spéit an d'Nuecht d'Wiss an eis mat wibbele gedoen. Den nächsten Daag, Christihimmelfahrt de 5te Mee 2016, stoung d'**Scoutskirmes** um Ordre du Jour. An hei hu mir nees de ganze classesche Programm duerchgezunn. Ugefang mat der Kirmesmass déi, vum Här Wallin zélébréiert a vun eis Scouten gestaltet gouf iwert Apéro, Konzert-Apéritiv vum Grupp sweet Pandora, Mettegiessen Volleyballturnéier, Kannerspiller a Kouhscheisspill. Esou war de ganzen Daag Eppes lass, mir haten vill ze dinn, waat jo mat Bléck op eis Kees nëmmen begréissenswert war, an owends fir 22:30 war daat läscht vun de groussen Zelter nees drëschen a senger Këscht!! Elo konnte mir et méih gemittlech gi loossen an op den manifesten Erfolleg vun der 2016ter Editioun ustoussen.

- Den **Wëllefchersrally** war de 5. Juni 2016 um Holleschbiereg zu Hesper Dëst Joer organiséiert vum Grupp Don Bosco Houwald ënnert dem Thema "Wou ass de Waldho?" Hei hun eis Wëllefcher, zesummen mat villen aneren Ruddelen e flotten Daag matt ville Spiller an der Natur verbruecht. Um Enn wor de Waldo natiirlech erem do. Gewonnen hun eis Frenn vu Reimech, déi duerfir 2017 den nächsten Rally organiséieren dürfen.
- Mëttwochs den 22 te Juni hu mir eis zahlreich, an an alle Gréissten ronderem eise Fändel afonnt, fir zesummen mat anere Vereiner den offizielle Feierlechkeeten vun eiser Gemeng fir den **Nationalfeierdag** beizewunnen.
- Samsdes den 2te Juli hate mir nees e grousst Faass opgemaacht an e ganze Koup Saachen beieneen geplangt. Ab moies hat sech d'Chefféquipe am Home RV ginn, fir, man höre und staune, ze raumen!! An engems gouf och schons Material bereet gemacht a verpaakt waat geschwënn um Summercamp a Portugal sollt an den Asatz kommen. An da stoung de **läschte Grupperot** um Programm deen ëmmer extra kurz ausfällt well eise Frënd a Gruppecheff de Steve eis duerno op eng Agape zur Feier vu sengem Gebuertsdag invitéiert.
- Daat ganz Joer haten eis **Raro** ëmmer nees Asätz, meeschtens um WE, fir hire **Projet vum Holzschapp** virun ze bréngen. Samsdegs de 5te November war fir sie déi läscht Schicht, bis op d'Elektrescht, war de Schapp du fäerdeg. Mais dovun héiere mir secher nächst Joer méih.
- 14 Deeg méih spéit huet eis e freedegt Ereigniss nees an de gréngen Hiemer op de Plang geruff. Eis Frëndin d'**Conny Welter**, een vun eisen treisten Scouten vun der 1. Stonn sollt Samsdegs de 16te Juli zu Fëlschdreff an der Kiirch mat sengem Steve bestued ginn. Kloer dass mir do nett fehle wollten. Als Viirbereedung op sein neie Stod, an als kleng Lockerungsübung fir en nächst Grillfest, hu mir d'Conny a sei Mann gedoen eis aus e puer Gromperen, mat primitivste Mëttel an mat nëmmen je enger Hand e puer Fritten ze maachen an ze schmaachen ze gin. Mais fir eis bewährten Diplomfriteuse war daat keen Problem an esou konnte mir déi 2, versinn mat eise bäschte Gléckwësch an engem Cadeau, op de wuelverdénkten Apéritif an déi nei Schoul entloossen.

- An du war et Zeit fir **d'Summercamp'en**. Bei de **Biber**, déi vum 17-19 Juli zu Beggen am Chalet um Eescherfeld waren, huet sech alles ronderem den **Alladin, den Gini an Yasmin** gedreint. Fir d'Yasmin aus dem Dschafar seng Hänn ze retten, hun d'Biber all hire Mut zesummen geholl. Sie hu sech an eng ganz daischter Höll getraut fir Zauberlande ze fannen. Wat si net wossten : Et koum een nett méih eraus ouni datt een all Schlüsselen fennt. Dest flott Exit-Game hu si gut gemeeschtert a mat Hellef vum Gini hu si d'Yamin konnten befreien. Vill Spiller hu sie an der Natur gemaach, e flotte Rally stoung op hirem Programm grad wéi och mol mei nodenklech Momenter. Réckbléckend hate sie vill Spaas an e ganzen Koup flott Errrennerungen wärten hinnen bleiwen.
- Vum 23. bis den 31.07.2017 waren dun och eis **Wëllefcher** un der Reih fir op de **Summercamp** ze zéien. Hire Wee huet sie op den Neiheischen geféiert, wou eise Frënd den Tom matt senger Equipe vum Native Village, e flotten Camp ënnert dem Thema „**Op Entdeckungsrees mam Wickie**“ organiseiert hat. Et waren em déi 200 Wellef do aus 12 verschidden Ruddelen aus dem Land. Als sougenannten „Ützendari d.h. Scouten“ hu sie all zesummen an engem groussen Zelt geschloof. Um Programm stoung : Workshops (Zenn geissen, Specksteen, Liedersäckelchen, Keramikbecher, Hütt bauen, Freundschaftsbännchen, ...), schwammen an der Syrdallschwemm, Olympiad, Keelebunn am Besch, Veillée, Kachworkshop (Zopp am Erdlach, Brout baacken, Wildnispizza), Nuetsspill, Oofschlossfiesta am Keltenhaus an natiirlech vill Fussball. Datt bei deem reiche Programm jidfereen misst op seng Käschte komm sinn versteet sech vu selwer.
- Vun elo un hu se an de Branchen ab Avex och nëmmen nach „**Summercamp**“ verstaan. Jidfereen huet Material am Home zesummegezunn fir mat a Portugal, a Mettwochs den 20te Juli hu sech e puer Cheffen ronderem de Manu am Home getraff, fir endlech den Unhänger an dem Carlo sei Bus ze belueden mat allem waat mir fir eis grouss Aventure a Portugal u Material brauche wollten. Nieft Schlofzelter, Kachgeschier, Ravi, Ateliersmaterial a Kichendeeler fir 31 Leit en ordentlecht Campliewen ze erméiglechen, huet de Manu och nach missen seng Famill an hirt Vakanzegepäck mat Ënnerdach kréien. Irgendwéi hate mir um Enn alles dran, a Freides den 22te Juli ass de Manu owends no der Arbecht an d'Nuecht gestart, Richtung Südwesten, Richtung Portugal. 2 Deeg drop, Sondes de 24te Juli hat de Räscht vun eisem Kontigent, fir 10:45 RV um Findel fir mam Flieger an 2 Stonnen dem Manu hannendrun ze kommen. **Juntos**, also „Zesummen“ daat war den Numm vun dësem Camp, an daat war och Programm. Zesummen, all eis zeltfäheg Brachen, Avex, Carapio, RaRo an 1 Albatross. An da war eis Zeltplaatze e grouss Portugiesesche Scoutszentrum tëschend Porto a Lissabon, wou de ganze Summer ganz vill Scouten aus Portugal, awer och aus anere Länner hir Zelter fir eng méih oder manner lang Zeit opgeschlo'en hun. Also ware mir och zesummen mat ganz villen anere Mënschen déi déi selwecht Idealer mat eis deelen an ëmsetze wëllen. Eng wonnerbar Zeit louch virun eis. Loftlinn 500 Meter vun der Atlantikplage ewech giong ëmmer eng erfrëschend Löftchen, a mir hun eis Kichen an eis Iessgelegenheeten direkt am Freien gebaut. Knaps datt mir ageriicht waren, ass de Camp no klassischem Schema lass gang. Atelier'en, Veillé'en a Spiller an dunn den Hike. Besonnesch d'Raro haten do daat grousst Lous gezunn. Sie haten eng kleng portugiesesch Partnertrupp via Internet fonnt, déi sie fir 3 Deeg mat an déi well

Schéinheet vum portugieseschen Hannerland gehollt hun. An engem verloossenen Duerf an de Bierger hu sie hir 2. Hike-Nuecht verbruecht. An hir gudd gelaunten a léif nei Frënn hu hinnen masseg portiesesch Iess, Sang an Danz-Gebrauch méih no bruecht. Daat war Europa ganz réel a ganz praktesch. Nom Hike hu mir Visite gemaacht zu Aveiro, Fatima, Batalha, a Coimbra fir eist wonnerschéint Gastland e wéineg kennenzeléieren. Onvergiesslech bleift de lëtzebuerger Owend, zu deem mir eng 30 Wëlefcher vu Madeira, hir Cheffen an d'Hikepartner vun de Raro invitéiert haten. Bei Biller, Bouneschlupp a Mielkniddelen hu mir eise Gäscht eng Viirstellung vu Lëtzebuerg vermëttelt. A wéi mir nom Iessen sie a Form vum Schibari mat lëtzebuerger Folklore konfrontéiert hun, du gouf et keen Hale méih. Eis temperamentvoll südlännesch Gäscht, déi schon souwiesou uechter den Daag gesongen a gedantz hun, wollten dach nett hannert deene Nordlichter do zeréckstoën. Jidfereen huet nach, an nach e Sang-an-Danz-Spill présentéiert, an esou hu mir bis spéit an d'Nuecht am Daischteren hautno déi vill beschwueren Bridderlechkeet ënnert de Scouten erlieft a genoss. Mir haten eis wirklech nei Frënn gewonnen. Et blouf nach e Sportdag a schon hu mir nees missten apaken. Fir eng intensiv Visite vu Porto ass eis Zeit nach duergang, an du soutze mir nees am Flieger deen eis Donnegdes de 4ten August spéit owends nees sëcher zu Lëtzebuerg ofgesaat huet. Eng grouss Aventure, op déi mir laang higeplangt haten war eriwer. Mais et bleiwen schéin Erënnerungen un e ganz schéint Land a ganz léif Mënschen. En extra grouss Merci nach emol dem Manu an dem Rafi, déi eis dëss wonnerbar Expéienz erméiglecht hun. 10 Deeg méih spéit war dun de Manu och nees zu Land, (do uewen, wéi se a Portugal soen), a mir hun Sondes de 14ten August nach zesummen eist' Material nees am Home deponéiert. Elo gouf et roueg am Scoutshome fir déi nächst 6 Wochen.

- Elo war, no em déi 150 normale Versammlungen mat de Kanner a Jugendlechen aus alle 6 Branchen, no mindestens 6 Grupperéit an enger Partie Virbereedungs-a Planungs Réuniounen vun de Cheffen vun den eenzelne Branchen an de 35 Wochen baussen de Vakansen, déi eng Saison ausmaachen, endlech Zeit, fir dat gréngt Hiem an de Foullard ze wäschen, ze strecken an op d'Sait ze léen bis déi nei Saison sollt mat der Rentrée erem ugoen.